

Te Pūrongo Whakahaere Pūnaha Aromatawai ā-Motu

Te Kura Kaupapa Māori o Ngāti Kahungunu o te Wairoa

Whiringa-ā-rangi 2022

NGĀ KITENGA O TE AROTAKE

Te Kura Kaupapa Māori o Ngāti Kahungunu o te Wairoa

1 Whiringa-ā-rangi 2022

Kua whakaaetia te aromatawai

I tēnei aromātaaitanga i kitea ake te kaha o te kura ki te whakahaere i ngā pūnaha aromatawai hei whakatutuki i ngā tono me ngā tūtohutanga o Te Whakaaetanga ki te Ture Aromatawai Paerewa 2022.

Kāore he tukanga i tāutuhia e whakararu ana i te mana o te kura ki te whakahaere i ngā tohu ā-motu.

Nā te pakari o ngā pūnaha, ngā tukanga, ngā tikanga whakahaere a te kura, me te āhei ki te tāutu me te urupare ki te nuinga o ngā take ka ara ake, kua whakatauria ake kia arotakengia anōtia te kura i roto i te toru ki te rima tau.

Hei whakaaroaro

Hei whakaaroaro mā te kura:

- tuarihia ētahi o ngā haepapa hei akoranga mā ētahi atu i roto i te kura kia whānui ake ai te puna mōhio ki ngā mahi a te Kaitakawaenga ki te Tumuaki
- tirohia ngā huarahi hei whakapiki ake i te kounga o ngā whiwhinga e whakatata atu ai ngā ākonga ki te Kaiaka me te Kairangi.



Kay Wilson
Kaihautū
Whakaū Kounga me te Takawaenga

7 Hakihea 2022

NZQA

0800 697 296

www.nzqa.govt.nz

Arotake tarāwhare, tarāwaho

Arotake tarāwaho

Mai i ngā taunakitanga i kitea kua whakatutukihia ngā tono me ngā tūtohutanga. (CAAS Guidelines 2.6iv, 3iv-3v)

Hei mahi mai i te Pūrongo Whakahaere Pūnaha Aromatawai ā-Motu i te 7 o Pipiri 2017 Kāore he take hirahira i whakatakotoria i te Pūrongo Whakahaere Pūnaha Aromatawai ā-Motu i te tau 2017.

Urupare ki ngā putanga aromātauria tarāwaho me ngā tukanga E piki ake ana te kounga o ngā tukanga urupare a te kura ki ngā aromātauria tarāwaho. Ka whai wāhi atu te Kaitakawaenga ki te Tumuaki me ngā kaiako ki te wānanga i ngā paerewa hei huarahi whakangungu, whakapakari pūkenga hoki. Ko ngā urupare he hāngai, ā, kotahi atu ngā kaiako ki te whakatikatika. Kei reira ngā kaihōmiromiro ki te whakatutuki i te wāhanga ki a ia arā, te whakaara i ōna whakaaro e pai ai te wānangatia iho o ngā kitenga me ngā whakataunga.

E kitea ana te mārama o ngā kaiako ki ngā tukanga aromātauria, kei te kitea mai te whakatinanatanga o taua mārama. Ka whai tonu te kura ki te arotake me te wānanga i tēnei wāhanga he ahakoa te aha.

Arotake tarāwhare

Te taunaki a te kura i āna tukanga aromātai me te arotake ki te tāutu i ngā wāhanga aromatawai hei whakapakari, hei whakatinana māna. (CAAS Guidelines 3iv)

Tukanga whakaū kounga Kātahi te kura whakapau kaha ko tēnei ki te aromātai i āna ake pūnaha, me āna tukanga. Kua tangata whenua tēnei āhuetanga ki roto i ngā kaimahi, ngā ākonga, me ngā whānau hoki. Ko ngā pouārahi o te kura me ana kaihāpai tētahi wāhanga whai panga nui ki ngā whakahaere a te kura, me te kaha tautoko a tētahi i tētahi. Koinei ētahi o ngā rautaki ka whakamahia e te kura hei whakaū i te kounga o ngā pūnaha aromatawai, e mātua tika ai ngā raraunga ka tukuna ki Te Mana Tohu Mātauranga, hei huarahi whakapakari anō i ngā tukanga aromatawai ā ngā kaiako.

Ka tautokona ngā ākonga ki te hono ki te pae tukutuku a Te Mana Tohu Mātauranga e pai ai te aromātai i ā rātou ake whiwhinga. Ko te painga hoki o tēnei, ka waia haere ki tēnei tukanga e māmā ake ai ki te totoro ki ngā aromatawai matihiko.

He kāpuinga kākaho I roto i ngā whakawhitinga kōrero me ngā kaiako, e kitea ana tō rātou mārama ki ngā tukanga whakaū kounga me te aromatawai. He hunga kaha ēnei ki te aromātai pūnaha me te kimi huarahi hei whakapiki ake i te kounga o ā rātou mahi kua mā te whai i ngā tikanga noa iho engari, mā te oranga pai o te katoa. Ko te maringanui hoki o ngā kaimahi a te kura, he rangatira kei roto i te kura e whakatauria ana i ēnei āhuetanga, ā, he nihoroa hoki nō ētahi i te kura.

He hui whānau, he wānangananga te mahi, he tātari raraunga, he whakarite ara mātauranga, he whakaū i te whanaungatanga o te noho tahi, e pai ai te kōkiri ngātahi i ngā kaupapa huhua noa a te kura. Ko tangata whenua tēnei āhuetanga ki roto i te kura, he mōhio nō rātou mā ngā whānau, mā te hapori, mā te kura hoki ngā ākonga nei e whakatupu. Katoa katoa ēnei rautaki hei awahi, hei manaaki i ngā ākonga me ngā whāinga, ngā manako e whāia ana e rātou.

He puna mātauranga Maringanui te kura ki te matatau me te mārama o te Kaitakawaenga ki te Tumuaki ki āna mahi. He ngākau titikaha ki te hāpai i ngā kaiako, ki te manaaki i ngā ākonga, ki te whai hoki i ngā tukanga e tika ana. E whakatakotoria ana te whakaaro i konei kia tiroiro ki te whakangungu, ki te whakapakari i ētahi ki ētahi o ngā haepapa nei, hei unu i ngā toimahatanga engari rā, kia whai wāhi atu ētahi ki te ako me tūpono kāore tētahi i reira, kua pai tonu ngā whakahaere a te kura. Ka kore taua puna mātauranga, ka uaua ake ki te pūkai i ngā mahi.

Te tautoko ake i ngā ākonga me ngā tikanga aromatawai

Te taunaki ake i ngā tikanga aromatawai me tana tautoko i ngā hiahia ā ngā ākonga. (CAAS Guidelines 2.5v-vii, 2.6i & ii and Assessment Rules for Schools, TEO's assessing Achievement Standards and Candidates 2023.)

Kia tū whakahīhi ngā ākonga o Kahungunu He utanga nui kei ngā pokohiwi o ngā kaiako. Ka noho ki te whakarite ara mātauranga mā tēnā me tēnā, ka kimi i ngā huarahi e taea ai e te ākonga te whakatutuki i ngā kaupapa aromatawai NCEA me te kimi i te hunga tika ki te ārahi i a ia.

He kōunga ngā akoranga, he whanaungatanga motuhake tō ngā kaiako me ngā ākonga, ā, he wāriu nui hoki tēnei.

Ko te aronga nui o ngā kaiako katoa, he poipoi, he rūmaki i ngā ākonga, ā, hui katoa i a rātou ētahi pūkenga rau motuhake hei whakakipakipa i ngā ākonga.

He wāhanga arotake ki ngā kaiako, he wāhanga anō ki ngā ākonga. Ka whai wāhi atu ai ngā ākonga ki te aromātai i tō rātou ake whanaketanga me te kimi i ngā rautaki hei whakatutuki i ngā whāinga kāore pea i tutuki noa, kei mua tonu i te aroaro hei whaitanga mā rātou.

Hei te mutunga o tētehi aromatawai ka noho ngā kaiako, ngā mātua me ngā ākonga ki te arohaehae i ngā mahi, me te whakamahere i ngā mahi hei mahi mai.

Kei reira anō te Kaitakawaenga i te roanga atu o te tau hei taituarā mō ngā ākonga.

Ngā tikanga aromātauirua tarāwhare hei whakaū aromatawai kōunga

Te taunaki ake ā ngā mahi aromātauirua tarāwhare, tarāwaho hoki ki te whakaū aromatawai kōunga. (CAAS Guidelines 2.6iii & vi, and NZQA Assessment Rules for Schools, TEO's assessing Achievement Standards and Candidates 2023.)

Kei te kura tonu āna tukanga whakahaere aromātauirua tarāwhare. Kua oti mai he tikanga aromatawai te whakaako ki ngā kaiako katoa, ā, kua oti anō hoki ētahi tukanga te panoni. Ka whakangungua ngā kaiako ki ēnei tukanga i ngā hui kaiako kia ōrite ai te mahi mā te katoa.

Ko te otinga iho o aua tukanga whakahaere aromātauirua tarāwhare, e kitea ana i roto i ngā aromātauirua tarāwaho me te taumata o whakaae a Te Mana Tohu Mātauranga ki ngā whakataunga ā ngā kaiako. He wāhanga tonu kei reira hei whakapakari mā ētahi kaiako, ā, ka whakapau kaha te Kaitakawaenga ki te Tumuaki me ētahi anō kaiako ki te awhina haere i ērā marau. Kei reira anō ngā taunakitanga o mua hei ārahi, me ngā tauira kei te pae tukutuku hei totoro mā ngā kaiako.

Appendix 1: Tikanga Whai Hua

Tikanga whai hua hei whakatutuki i ngā hiahia o ngā ākonga

E taunga ana ngā pūnaha me ngā tukanga whakahaere a Te Kura Kaupapa Māori o Ngāti Kahungunu o te Wairoa ki te whakatutuki i ngā hiahia o ngā ākonga mā te:

- waihanga hōtaka ako, hōtaka aromatawai whai panga ki te ao o te tamaiti, ōna manako, ōna korongā
- totoro ki ngā kaihora tarāwaho hei whakawhānui i ngā aheinga aromatawai
- whakarite wā motuhake ki te whakawhiti kōrero, ki te wānanga, ki te whakahoki kōrero anō hoki ki ngā ākonga kia puta ai te kounga, kia ekea hoki ngā taumata o angitū
- taki aromatawai i te wā e rite ana te tamaiti
- kimi ara huhua ki te kohi taunakitanga aromatawai hei whakatutuki i ngā hiahia o ngā ākonga

E taunga ana ngā pūnaha me ngā tukanga whakahaere a Te Kura Kaupapa Māori o Ngāti Kahungunu o te Wairoa ki te:

- whakahaere i ngā aromatawai tōmuri, aromatawai mahue
- whakahaere i ngā aromatawai whakawhānui aheinga
- tūhura i ngā whakataunga aromatawai ka puta i ngā tono ā-ākonga
- whakamahi rautaki huhua noa ki te aroturuki i te tūturutanga o ngā mahi ā ngā ākonga
- kohi taunakitanga pono me te tika hei whakatūturu i ngā taunaki kī taurangi
- tautiaki i ngā kōrero matatapu ā ngā ākonga

Aromātairua tarāwhare, tarāwaho whai hua hei whakaū i te kounga o ngā aromatawai

E taunga ana ngā pūnaha me ngā tukanga whakahaere aromātairua tarāwhare a Te Kura Kaupapa Māori o Ngāti Kahungunu o te Wairoa mā te:

- arohaehae i ngā tūmahi aromatawai i mua i te whakamahinga
- whakamahi i ngā aratohu whakamārama, ngā tauira, ngā pitopito kōrero a te kaiwhakatūturu, me ngā akoranga ara rau hei ārahi i ngā whakataunga aromatawai
- whakamahi mātanga kaupapa ako hei whakatūturu whiwhinga mō ngā mahi ā ngā ākonga i āta tīpakoria
- whakamahi kaiwhakatūturu tarāwaho
- te whakapukapuka i ngā hātepe tukanga aromātairua tarāwhare
- arohaehae me te whakapukapuka i ngā tukanga aromātairua tarāwhare hei whakaū i te kounga o ngā whiwhinga i mua i te tuku ki a NZQA

E taunga ana ngā pūnaha me ngā tukanga whakahaere aromātairua tarāwaho a Te Kura Kaupapa Māori o Ngāti Kahungunu o te Wairoa mā te:

- whakarite me te pupuru i ngā tauira mahi ā ngā ākonga kia mātua rite mai
- tīpako tauira mahi e ai ki ngā tikanga a NZQA
- urupare ki ngā putanga o te aromātairua tarāwaho me te hāpai i ngā kaiaromatawai i ngā wāhi whai hua
- aroturuki me te whakapukapuka i ngā hātepe ka whakatinanahia i runga anō i ngā whakahoki pitopito kōrero ā ngā kaiaromātairua tarāwaho
- whakamahi i ngā whakataunga aromātairua tarāwaho ki te aromātai i ngā hua o ngā tukanga aromātairua tarāwhare.

Whakahaerenga raraunga whai hua

E taunga ana a Te Kura Kaupapa Māori o Ngāti Kahungunu o te Wairoa ki te whakamahi i ngā raraunga aromatawai hei tautoko i ngā whakataunga ā ngā ākonga mā te:

- aromātai i ngā hua o ngā hōtaka aromatawai kia mātua hāngai ki ngā hiahia o ngā ākonga, ngā whāinga, hei tohu i ngā panonitanga ki ngā hōtaka me ngā paerewa
- apoapo i te reo o te tamaiti hei take aromātai i ngā kaupapa ako me ngā aromatawai me tūpono me panoni, me whakahoropaki, me tīni aromatawai rānei
- tuku pūrongo ki Te Poari me ngā putanga NCEA hei huarahi whakamahere rautaki, whāinga, tutukinga.

E taunga ana a Te Kura Kaupapa Māori o Ngāti Kahungunu o te Wairoa ki te tuku pūrongo raraunga whai hua mā te:

- tuku kōpae raraunga i ngā wā e tika ana

- titiro ki ngā hapa kei te Key Indicators me ngā pūrongo a NZQA
- whakauru wawe i ngā ākonga e whai ana i ngā whakamātautau tarāwaho, me ngā whiwhi tarāwhare kāore i whai whiwhinga
- tuku whiwhinga ki raro i te kaihora tika me te whai Whakaaetanga

Te pāhekoheko aromatawai whai hua hei huarahi whakamōhio i ngā kaiako, ngā ākonga me ngā whānau

E taunga ana ngā pūnaha me ngā tukanga whakahaere a Te Kura Kaupapa Māori o Ngāti Kahungunu o te Wairoa ki te:

- whakaputa mōhiohio hāngai ki ngā aromatawai
- tuku puka mōhiohio ki ngā ākonga
- tuku hōtaka ako ka whāia e ngā ākonga
- tauawhi i ngā ākonga me te aromātai i ngā tutukinga
- tuari i ngā kaupapa here aromatawai o te wā ki ngā kaiako i te roanga ake o te tau
- whakarite huarahi e taea ai e ngā mātua ngā whiwhinga, ngā whanaketanga ā ngā ākonga te kitea mai
- tautoko i ngā kaiako hou ki te kura ki te whakawhanake i roto i ngā hōtaka a te kura, me te mārama ki ngā tukanga aromatawai a te kura, a NZQA hoki

He mea tautoko e Te Kura Kaupapa Māori o Ngāti Kahungunu o te Wairoa i te māramatanga ki ngā tukanga aromatawai mā te:

- tuari i ngā pitopito kōrero aromatawai, i roto i ngā hui mātua, hui whānau me ngā huihuinga ākonga
- whakamōhio atu ki ngā ākonga ngā huarahi mātauranga e taea ana
- tautoko i ngā ākonga kia mārama ai ki ngā huarahi e ekea ai a angitū, e whai tohu ai ia

Appendix 2: Tirohanga Whānui

Tēnei Pūrongo

He pūrongo whakarāpopoto tēnei i te arotakenga a NZQA i Te Kura Kaupapa Māori o Ngāti Kahungunu o te Wairoa ki te:

- whakaea i ngā take i tātuhia i te arotake Pūnaha Whakahaere Aromatawai ā-Motu mā roto mai i tāna ake arotake tarāwhare
- whakahaere tikanga aromatawai mō te tohu ā-motu
- te whakahaere aromātairua tarāwhare, tarāwaho
- te whakamahi me te whakahaere i āna raraunga aromatawai
- te whakaū i ngā kaupapa here me ngā tikanga whakahaere, me te tuari ki ngā kaiako, ngā ākonga me ngā whānau.

He aha i arotakengia ai ngā pūnaha whakahaere aromatawai a te kura

Te take o Te Whakahaere Pūnaha Arotake ā-Motu:

- ki te whakaū i te kounga o ngā whakahaere a te kura, i runga anō i te pūrongo a Te Tari Arotake Mātauranga, me te hāngai ōna ki ngā tikanga o te Whakaaetanga ki te Aromatawai i ngā paerewa, e ai ki te Papatohu Paerewa Aromatawai 2011 (Consent to Assess Against Standards on the Directory of Assessment Standards Rules 2011) me ana Whakahaerenga – (CAAS Guidelines) e āhei tonu ai te kura ki te aromatawai i ngā paerewa ā-motu mō ngā tau kei mua i a ia, ā,
- hei āwhina hoki kia tika ai, kia ōrite ai, kia pono ai ngā mahi aromatawai ā-roto, kia hāngai tonu ki ngā whakaritenga o ngā *Ture Whakahaere Aromatawai me ngā Whakamātautau mō ngā Kura Tuarua (Rules and Procedures)*.

Ngā tūmomo putanga e taea ana

Ngā tūmomo putanga a NZQA:

- te tāutu i te kounga o ngā tukanga arotake a te kura, āna tikanga whakahaere aromatawai me te kounga ki te whakaū i aua whakahaere
- te whakahau i te kura kia mātua tutuki ngā hei mahi me tūpono kāore i tatū ai ngā whakahaere ki ngā ture o te *Whakaaetanga ki te Aromatawai*
- te whakaae tahi me te kura ki ngā take ka tātuhia me tūpono ka hē kē atu ngā whakahaere
- te tohu i ngā mahi hei whakaroaro hei whakapakari ake i ngā tikanga aromatawai.

Ngā wāhanga o te arotake

E toru ngā wāhanga o tēnei arotake:

- te aromātairua tarāwaho ā-tau i te aromatawai tarāwhare a te kura
- te hihira ā-tau i ngā pūnaha aromatawai tautuhi
- te hihira ia rima tau i ngā pūnaha aromatawai a te kura

Te whakahaere i te arotake

I tēnei arotakenga i mātaitia ngā kohinga kōrero a te kura me te wānanga i te hunga whaipānga.

Te whakahaere i te aromātaiatanga

I tēnei aromātaiatanga i kohia ngā pukapuka, ngā kōrero a te kura, ā, i uiuitia te hunga whaipānga.

I mua i te aromātaiatanga ka tukuna mai e te kura:

- ngā taipitopito o te arotake me ngā whanaketanga mai i Te Pūrongo Whakahaere Pūnaha Aromatawai ā-Motu whakamutunga
- *Puka Ākongā*
- *Puka Kaiako*
- *Ngā Kaupapa Here me ngā tikanga NCEA*

I hui tahi te Tumuaki Whakawhanaungatanga Kura me:

- te Kaitakawaenga ki te Tumuaki
- ngā Kaiako o te Kura Tuarua
- ngā ākongā

I te mutunga iho i huitahi te Tumuaki Whakawhanaungatanga Kura me te Kaitakawaenga ki te Tumuaki ki te kōrero mō ngā kitenga. I kōrerotia hoki ngā āhuatanga e taunga ana i roto i te kura, ngā wāhanga i whakaae tahitia hei whakapakari mā te kura.

KUPU TAKA

Arohaehae	critique, appraise
Aromātai	review
Aromatawai anō	further assessment opportunity
Aromatawai Hira	Special Assessment Conditions
Aromātairua ā-roto	internal moderation
Aromātairua ā-waho	external moderation
Aroturuki, aroturukihia	monitor, to monitor
E kitea atu ana	reflecting
Kaiaromātairua ā-waho	external moderation
Kaihautū	Manager
Kaiwhakahaere ā-Ture	Limited Statutory Manager
Kōnae raraunga	data file
Tumuaki Whakanaungatanga Kura	School Relationship Manager
Matakōrero	Secondary Qualification, circular
Mauhanga	record
Mutunga iho	consequences
Ngā mahi papai e whakahaeretia ana ā-motu	national practice
Ngā pakaritanga me ngā ngoikoretanga	strengths and weaknesses
Ngā tohu tau	Numeracy
Ngā Whakahaerenga Whakarite Hōtuku	administration
Pakirehua	enquiry (thinking)
Pepa aromatairua ā-roto	internal moderation cover sheet
Pūnaha	system
Putanga	version
Raraunga	Data
Raraunga Whiwhinga	Results data
Reo Matatini	Literacy
Takawaenga Wharekura	Principal's Nominee
Tātari, tātarihia	analyse, analysis
Tauaki Aromatawai	assessment outline
Tatauranga	statistics
Taunaki	evidence
Taunaki Kohuku	partial evidence
Tāutuhia. tāutu	identified, identify
Tukanga Whakaū Kounga	Quality Assurance Process
Te Anga Tohu Mātauranga o Aotearoa	NQF
Tipako tupurangi	random selection
Tuarongo	background
Tukanga	process
Uhi Aromātairua ā-Roto	Internal Moderation Cover Sheet
Urupare, uruparetia	respond, response
Whakaaetanga	memorandum of understanding
Whakakōnae, kōnae	to file, file
Whakaruruhau	Standard Setting Body
Whakatau whakamutunga	final decision
Whakaū, whakaūtangahia	assure, verify, verification
Whakawhanake ngaioatanga	professional development
Wetewete hōtuku whiwhinga	results data analysis
Whiwhinga Tauawhi	Derived Grades
Whiwhinga tuhituhi, pānui, pāngarau	Literacy and Numeracy credits